

REGIONAL NEWS BULLETIN

Date – 25/03/2026

Time - 18:30 Hrs

HEADLINES (EVENING)

1. Thlathar April ni 21-a Aizawl Municipal Corporation inthlanpui neih tur atana hming thehluh hun chu vawiin tlai dar 3 khan khar a ni.
2. Larsap General (Retd) Vijay Kumar Singh-a'n Mizo thalaite chu pianpui thiamna nei tha an nih avangin mahnia eizawna bul tana eizawna siamtu ni turin a fuih.
3. Sawrkar laipui chuan West Asia indona chungchangah vawiin khan Political Party tin aiawh inhmukhawm a ko.
4. United States chuan Iran nena indona titawp turin rawtna 15 a thawn.

<><><>

AMC

Thlathar April ni 21-a Aizawl Municipal Corporation (AMC) inthlanpui neih tur atana hming thehluh hun chu vawiin tlai dar 3 khan a tawp a, party 3-ZPM, MNF, Congress leh BJP atangin mi 68-in Corporator chuh turin hming an thehlut.

Tun thla ni 18 a State Election Commission (SEC)-in AMC inthlanpui neih hun tur a puan atanga vawiin thleng khan AMC corporator chuh tura hming pekluh hun hi hawn a ni a, SEC-in a ruahman angin inthlan buaipuitu tura a ruat Returning Officer (RO) mi 4-te hnenah hming pekluh theih a ni. Kan corr report ngaihlath ang.

Aizawl Municipal Corporation inthlan hi kil 4 atangin chuh a ni dawn a, ZPM, MNF leh Congress Party te chuan Ward -19 an chuhkim vek a, BJP Party-in ward 11-ah an chuh thung a, Corporator candidate tura hming thehlut te hi an vaiin mi 68 an ni a, chung zinga 28 te chu hmeichhia niin, INC leh ZPM-ah hmeichhe candidate 9 ve ve, MNF-ah 7 leh BJP-ah 3 an awm a ni.

Hming pekluh te hi naktukah endik a ni anga, tun thla ni 30 thleng inhnudawh leh hun hawn a ni.

AMC inthlan vote thlak ni hi April ni 21 ruat a ni a, April ni 27 ah vote chhiar a ni ang. Aizawl Municipal Corporation-ah hian ward 19 a awm a, heng zingah hian hmeichhiate tan a hauh bik ward hi paruk, ward no 2,4,5,11 leh 12 te a awm a, a bak ward 13 te chu candidate atana mipa leh hmeichhia nih theih ve ve na ward a ni thung.

<><><>

GOVERNOR

Larsap General (Retd) Vijay Kumar Singh-a'n Mizo thalaite chu pianpui thiamna nei tha an nih avangin mahnia eizawna bul tan a, hna zawngtu ni lova hna siamtu ni zawk turin a fuih.

Vawiina ICFAI University, Mizoram leh LESDE Mizoram tangkawpin thalaite thiamna tihmasawna leh hna zawng tura "One-Day Skills Development Conclave" an buatsaihah thusawiin, Larsap chuan ram din khawchhuahna tura "skill development" pawimawh zia sawiin, Mizo thalaite chu pianpui thiamna nei tha leh thawkrim an nih thu sawiin, India leh khawvel pum inelnaa lang pha turin thiamna dik tak, inphochhuahna hun tha leh inrintawkna neih chu tun dinhmuna an mamawh a ni, a ti a. Thalaite chu India leh khawvel huap ang pawha inphochhuahna hun remchang an lo hmu a nih pawhin, mahni hnam ziarang leh chawr chhuahna hlamchhiah lova nghet taka vuan zel turin a chah a; Mizoramin tunlaila sector thang duang ber service sector hnuaiah hlawkna a tel thu sawiin, kutthemthiamna tipung turin chin dan thar leh mahni kutkawih eizawna kalkawp tir thiam a tul a ti a. Sawrkar hnain mi zawng zawng a daih sen loh avangin private sector leh entrepreneurship lam ngaihven deuh deuh a tul tih a sawi.

ICFAI Vice Chancellor Prof. (Dr.) Ginlianlal Buhiril chuan zirlaite tan lehkhahu behchhan thiamna piah lama tak rama hman theih thiamna neih a pawimawh zia a sawi a. He hunah hian zirlai, zirtirtute leh hnathawh kawnga tawnhriat nei tha zawk te an kal

khawm a, tunlai khawvel thang chho zelah thiamna tak phawk chhuak zirna neih a pawimawh tawh zia uar taka sawi a ni.

<><><>

MUHCS COMPARISON

Mizoram Universal HealthCare Scheme thawh hnihna, MUHCS 2.0-ah Pensioner tih loh, Sorkar hnathawk nghet, mi nawlpui leh Golden Card neite tan thil thlak danglam a awm lo a, All India Service leh Central Service Mizoram sorkar hnuaiia thawk mek ten MUHCS 2.0 an zawm ngei a ngai tawh dawn.

Vawiin khan Finance Secretary Pu Ramchuana chuan a pisa-ah thuthar thehdarhtute kawmin MUHCS 1.0 leh MUHCS 2.0 danglamna te a sawifiah a, MUHCS 2.0-ah chuan Sorkar hnathawk nghet bakah mi nawlpui leh Golden Card neite tan thil thlak danglam a awm lo a ti a, mi nawlpui te 'Contributory' ti-a sawi thin chu 'General' tia thlak a ni thung a, CSS hnuaiia thawkte tan kum khatah vawi hnih (2) Contribution pek phalsak an ni a, MUHCS 2.0-a danglam lian ber chu Pensioner-te tana siam Category A leh B paih bo niin, thla tin cheng 1000 theuh an thawh a ngai tawh dawn a ni.

Kan corr report lo ngaithla ang.

Finance Dept hotute sawi danin, MUCHS 2.0 hnuaiia hian Pensioner te chu cheng nuai 12 thleng an senso pek sak an ni vek tawh dawn thung a ti a. Pensioner ten Ration card anga an chhungkaw member zawng zawng an ziah luh chu titawpin, an kawppui-te chauh a huam tawh dawn a, chhungkaw member dang zawngte chu general Category anga inziah luh ve mai tur a ni dawn a. Pensioner-te chuan Pension scheme an zawm lo a nih chuan General category-ah inziak lut thei lo a, an chhungte pawh chhungkaw member angin an ziak lut thei lo bawk a ni.

MUCHS 2.0 hi All India Service (AIS)/Central Service (CS) Mizoram sorkar hnuaiia thawk mek ten an zawm ngei a ngai tawh a, an thla tin contribution zat leh hamthatna chu Mizoram sorkar hnuaiia thawkte ang tho a ni dawn a. AIS leh CS pensioner te chuan Mizoram chhungah chauh MUHCS an zawm thei a, State pawnah erawh CGHS zawm duh tan an zawm thei thung a ni. An hamthatna leh contribution zat chu civil pensioner Scheme anga kalpui tur a ni a, hetihlai hian vawi khatah contribution pek tlak nghal vek tur a ni a. State pawna inenkawlina atana an zinna senso tumsak an ni dawn lo a ni. MUHCS zawmtute chu khawi Category-ah mah awm kawp phal a ni lo a, awm kawpte chu system lamin a paih zel dawn a. Non-empaneled Hospital-ah refer theih dan khauh zawka siam a ni bawk.

<><><>

MUHCS

Mizoram sorkar Health Care Scheme MUHCS 2.0 hnuaiia sorkar hnathawk Pension hmun 3-a thena hmun 1 pawh tling loin an zawm.

Finance Secretary Pu Ramchuana chuan a pisa-ah thuthar thehdarhtute kawmin, MUHCS 2.0 chungchang a sawifiah a, MUCHS hnuaiia pensioner te dinhmun sawiin tunah hian mi 37,000 zinga 10,400 vel chauhin an zawm a, Pensioner-te inenkawlina senso hi a vaiin cheng Vbc 26.84 tling tawhin damlo pakhat tana senso chawhrualin pensioner-te an sang ber a, hetihlai hian nikum April thla atanga kumin February thla thlenga Pensioner-te sum thawhkhawm tling khawm chu cheng vbc 79.33 a ni a ti.

MUHCS hnuaiia hian Pensioner-te chhungkua, ration card anga huamtir vek tawh lovin an nupui/pasal chauh an kep thei tawh dawn a, Sawrkar hnathawk zawkte an chhungkaw member zawng zawng huamtir a nih loh laia annih huamtir a ni chu a fello a ni a ti a, hemi chungchangah hian Pensioner-te puala scheme kalpui tum dan chu Pensioner lamin an duh lo a nih chuan Pensioner-te puala scheme siam kher chu a tulin a lang lo a ti a. Mipui nawlpui anga General Contributory beneficiary anga an zawm ve mai dan tur ruahman chu thil har lo ni mah se Fixed Medical Allowances FMA la bawk, MUHCS hlawkna dawn bawk a rem lo tih sawiin, MUHCS hi scheme dang hmanga an zawm dawn a nih chuan FMA a surrender a ngai dawn tih a sawi a ni.

Pu Ramchuana chuan, MUHCS 1.0-ah pensioner-te tan Central Govt. Healthcare Scheme (CGHCS) hnuaiia pensioner an kalpui dan ang deuhin pensioner-te'n Fixed Medical Allowances (FMA) an dawn theih an surrender a ngai a, hei bakah hian

Sawrkar hna an thawh laia an level puite contribute zat an thawh ve a ngai a, an sum lakluha inngat an chhungkaw member-te a huam a ni a ti.

Hetihlai hian Mizoram Sawrkar hnuai pensioner-te chuan FMA an lak chu an surrender duh lo a, Pensioner-te nena indawrna an neih hnuah an duh dan zulzuiin MUHCS 1.0 hnuai Category A leh B-ah thenin, Category 'A' chuan thla tin cheng 1000 thawhin kum khatah cheng nuai 12 thleng a thlawnin an inenkawl thei a, Category 'B' chuan thla khatah cheng 7500 thawhin an senso cheng nuai 85 thleng tum sak theih an ni a. Semi Private Ward pek theih an ni a, dam lo zin veivahna pek sak theih a ni bawk a ti.

<><><>

PADMA SHRI LABIAKTHANGA BDAY

Padma Shri Hav.Lalbiakthanga Pachuau, Indopui Pahnihna a tel India sipai dam lai zing upa ber piancham chu 23rd Sector Assam Rifles 3rd Batallion-in lawmpuiin piancham chibai an buk a, kum 99 pianchampha vawiin khan a hmang a ni. Tukin khan Assam Rifles Band Party te chuan Chanmari, Aizawl-a an chennaah a piamcham vawi 99 na pualin hun an hmang a, hei bakah hian 23rd sector Assam Rifles, 3rd Battalion hmun Khatla ah a piancham puala cake zaina hun leh chhun chaw eikhawm an buatsaih bawk. DIG Brig Puspendar Sorayan DIG chuan Pu Lalbiakthanga piancham lawmna thuchah sawiin Uniform ha tawh zinga senior ber leh sulhnu tha tak nei a ni a, ramchhung chawimawina sang ber adawng thei chu an chhuang hle a, Mizoram mipui te pawn amah ang entawn tlak an nei chu an vannei hle a ni a ti.

Padma Shri Hav Lalbiakthanga Pachuau hi March ni 25, 1927 khan Saichal-ah a piang a, a nupui Lalbiaksangi, Asst Matron (Rtd.) nen inneiin fa paruk an nei a, tu 17 leh tuchhuan 14 an nei a ni.

India working journalist upa ber niin, kum 2020 khan Literature & Education - journalism ah Padma Shri Chawimawina hlan a ni a, hei bakah hian sipai a tan lai leh a pension hnu in chawimawina hrang hrang thahnem tak a dawng a. Mizo ten kan hriat lar Akashvani Aizawl-a announcer hna a pension thlenga thawk, Radio artist Lahlungchhungi Pachuau hi a fate zing ami a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

ALL PARTY MEETING

Sawrkar laipui chuan West Asia indona chungchangah vawiin khan Political Party tin aiawh inhmukhawm a ko. He meeting hi Parliament Complex-ah neih a ni dawn a. Union Minister Pralhad Joshi chuan harsatna ramin a tawh lai hian a tha lam zawngin opposition ten mawphurhna an nei a ti a. Mahse tun dinhmunah erawh party politics an khel nasa thung a ti.

Prime Minister Narendra Modia chuan Parliament in hnihah West Asia buaina chungchangah hian thuchah sawiin ramchhunga tuialhthei, gas leh lei tha te mamawh khawp a awm theih nan sawrkarin a tul angin hma alak thu a sawi a ni.

<><><>

US PROPOSAL

United States chuan Iran nena indona titawp turin rawtna 15 a thawn. Heng rawtna te hi ram pahnih inkara palaiten an thlen a. Rawtna zingah hian Iran chua nuclear a siamna hmunpui pathum thiat turte, uranium a chekkhawh ti tawp turte leh ballistic missile programme a neih mekte ti tawp turin a phut a. Hei bakah hian ralthuam keng pawlte a ruka a puih thin ti tawp tur leh Strait of Hormuz hawng leh tura phutna te a tel bawk a ni. He rawtna ang chuan thla khat chhung inkahhai puan leh nuclear ralthuam hmang miah lo tura Iran intiam tirta a tel a ni.

Hetihlai hian rawtna hi a pawm chuan Iran laka hrekna hrang hrangte hlih a ni ang a. US chaun Bushehr-a kawlpheha siamna tura civil nuclear programme Iran in a kalpui mek chu a pui dawn bawk a ni.

White House-a chanchinbumite hmaah President Donald Trump-a chaun White House in indona titawp turin indawrna a kalpui reng a ti bawk..

<><><>